

《佛說無量門微密持經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 19, No. 1011

No. 1011 [Nos. 1009, 1012-1018]

佛說無量門微密持經(一名成道降魔得一切智)

吳月支優婆塞支謙譯

聞如是。一時佛遊於維耶離國大樹精舍。佛告賢者大目犍連。汝行請遊三千大千世界比丘。為弟子行及菩薩行者使會。目連受教步須彌頂。以道神力周遍佛界聲告使知。應時精舍有四十萬比丘會。復現神足令是天下猗行比丘。悉會精舍稽首畢一面住。佛復告慧見菩薩敬首菩薩。除憂菩薩虞界菩薩。去蓋菩薩闡音菩薩。殆棄菩薩眾首菩薩。辯音菩薩慈氏菩薩。汝等行請十方無央數佛國諸一生補處。無所從生法忍。及不退轉信解菩薩悉令會此。即皆受教而為感應。時有八百億一生補處菩薩。三百億得無所從生法忍菩薩。百億不退轉菩薩。六百億信解菩薩。皆乘佛聖旨神足來會

賢者舍利弗見大眾會。心念當問如來妙行。演現其要令諸菩薩。一切望畢得無礙辯。遠聞十方無數刹土諸佛說法念不中忘。至於無上正真之道為最正覺。疾使菩薩得四清淨。何等為四。一曰人淨。二曰法淨。三曰慧淨。四曰佛國嚴淨。亦疾使菩薩得四願悅。何等為四。一曰身和悅。二曰言和悅。三曰意和悅。四曰滅和悅。已得四願悅便入四持門。何等為四。一曰如文行入持門。二曰內深忍入持門。三曰解人根德入持門。四曰知行報善入持門。舍利弗思念。是菩薩清淨無量慧地欲令佛說

於是佛語賢者舍利弗。讚言善哉意至。欲使諸菩薩疾成持行。若舍利弗菩薩行此持要句者。疾入無量之門得微密持。謂是無為無向如正意解。為應為滅內明順道為履上述。如微妙行不動寂靜。無量無上微密無垢。清淨自然惟無。惟無所著明光悅懌。果而大勇為美譽。動無動以正動近道。因能善與遊無罣礙入諸法門。強而有勢光大照。遠解等意無不入不斷持實。如是舍利弗行持菩薩非有數也。行無數法為不以知故。諸法斷覺而不作不見合法離。不見起不見滅。不有去來現在之智。亦不知法。已成未成隨佛念行不念相。亦不好不種姓。不群從不方土。不勞盡不以知無。不知不人淨不法說。不我利不彼利。不法律不行不除。不念身不念人。於一切法行無受者名為念佛。為一切法之正歸也。為是無畏持義之藏。妙願已滿上道已備。調靜諸定一切德本。不由彼致自從法生。種姓相好其行自然。無邪行無斷行。是為菩薩能學無量門微密之持。為不退轉於無上正真之道。所以者何是從眾生之行。而致無量得行之持。於是佛說偈言

法空無望得
奉經而不亂
是經義為妙
學聞斯慧者
菩薩得此持
十方彼諸佛
一切能受持
意解如日明
至於無上法
一切是得向
正使一切人
悉能解諸結
是坐上道者
常厚護持法
菩薩所貴重
名譽蓋於世
八十億諸佛
一切皆授手
若於往千劫
一月可以除
菩薩所興福
善誦是持者
念意如強意
向行眾德本
假使三界人
不能中得害
是說幻如諦
諸佛自此出
昔吾學道時
如恒沙等佛
欲聞十方佛
當專習是經
若願嚴佛國
光相及種好
能除放逸念

為道莫自恣
則是疾得持
持無極常念
可得成道行
常行精進者
說法輒得聞
執義正不忘
自恣微妙行
弘大持之門
為能擁護經
盡劫共難聞
其智不可極
得為法王子
內性好斯經
十方佛亦愛
行此為無量
終時悉得見
接行此持者
而為不善行
但當守此經
億劫來積聚
一日可與等
思惟此上持
必成至覺道
一切悉為魔
唯行是經者
為極法之要
道意所由生
得決於錠光
我悉於中見
所說悉覺識
一切可疾得
合成弟子眾
當從是經得
七日專惟是

八十億佛臻
不以意思意
意而不有思
宜熟解此經
得此持如海
欲安諸天人
此為道之座

共授以此持
亦不思無意
然後可得持
勿有忘於道
不復勤於財
一切願無難
但當正意行

又舍利弗菩薩有四法行。疾得是持。何等為四。已厭惡於愛欲。已無貳害於眾生。以一切有而為布施。以無疲厭晝夜樂法。復有四法行疾得是持。何等為四。能習山澤居內。行深法忍不慕彼利養。行無量施不惜軀命。復有四法行疾得是持。何等為四。一曰入八字義。八字義者謂迹敏惟棄悲調滅忍。常書持是。二曰誦說常以調意。三曰內性合是法要。四曰勸行大道之行。菩薩如此為疾得持。於是佛說偈言

當棄欲苦行
無自恣作惡
是不作彼近
愛眼視眾人
眾人之有諍
故盡汲汲劇
欲法者晝夜
得持而心向
閑居習佛教
深忍却放逸
法不猗知利
見失當棄利
快哉得佛教
信者成道學
智士不貪利
佛從遠斯成
當思八字義
常誦用調已
得坐大智署
無量佛在前

速捨愚癡地
惡令墮惡道
不知利譽事
必貴如得色
皆由貪為本
棄是乃得持
捨異唯道求
是以常見經
住此不知彼
常如救頭然
亦不有身求
人以利為行
捨家離眾苦
敬佛法為智
何況行法者
故當捨利求
善書持此經
亦以開化人
一切見十方
勸成其道欲

又舍利弗菩薩有四德為是持。何等為四。一日常念諸佛。二曰不有邪行。三曰疾除行蓋。四曰得入無量門微密之持。有昔舍利弗往無央數不可計劫。時有佛名寶首曜王號如來至真等正覺明行成為善逝世間解無上士道法御天人師為佛眾祐。度人無量臨

滅度時。世有轉輪王名光秉。其太子曰無念德首。年千八百歲。從佛得聞此持而即奉行。又七千歲未曾睡臥。又七千歲未曾起身愛。又七千歲未曾念財利。又七千歲一心念行未曾傾倚。於是則見九十億佛悉聞說法皆從受持。便作沙門積九萬歲。以是無量門微密之持。解說眾人於一世中。成就八十億人。使行無上正真之道。誘進令出家立不退轉地。彼時眾中有尊者子名為月行。聞是法要盡心願樂。以此德本值七十億佛。皆從得上持逮諸菩薩無量之辯。其後三劫悉見諸佛。三劫末時月行得佛名曰銳光。號如來至真等正覺明行成為善逝世間解無上士道法御天人師為佛眾祐。又彼太子無念德首。講說法者則今西方無量壽佛是也。此賢劫中諸菩薩聞是法願樂者。皆得除後四十萬劫生死之行。又是學者欲疾作佛。若得是經如有願樂道行之意。則是當立不退轉地。必為無上正真之道。何況書持誦行。一切人民莫能稱量說其福也。於是佛說偈曰

常修念佛者	眾邪不得便
行蓋用疾除	得妙無量持
聞經心願樂	書持敬諷誦
天人莫能計	福廣無有量
所生輒見佛	信向不迴動
體解深經要	疾覺斯上道
得持惡道斷	不失定大財
色好常見佛	即至覺上道
尊者子聞持	即追識宿命
見佛九十億	得道如其願
若欲疾成佛	道力降眾魔
欲滿百福相	行此非有難
如滿恒沙剎	積寶以布施
比書持此福	終不得為比

是舍利弗菩薩行持者。有八大神在雪山中。共視護之。其名曰勇決神果強神。饒裕神雄猛神。體行神清潔神。難勝神多安神。斯神必來。常當澡浴淨其被服正色經行。慈念眾生思是法要。神面不遠必安定誦。復有八菩薩今在欲行天。常當存念。其名無愛天悅可天。智光天懷金天。積習天願滿天。星王天行審天。斯皆敏行此持者。當諦惟持而常恭敬。已如應行微妙法忍。無得輕試。說是法時恒沙等菩薩。皆得是持而不退轉。六十亥天與人未發道意者。今皆發起無上正真之道。賢者舍利弗白佛言。當何名此經。佛言是法之要。名無量門微密之持。一名成道降魔得一切智。當奉持之。佛說是已皆歡喜受

佛說無量門微密持經